

Interview



Mars Di Bartolomeo au sujet de la Journée mondiale de la Santé

"RTL Radio Lëtzebuerg" du 07-04-2008

Frank Kuffer: Gudde Moien Här Di Bartolomeo.

Mars Di Bartolomeo : Gudde Moien.

Frank Kuffer: De Sujet huet wéi gesot d'OMS virgeschloen. Ass dat awer fir lech och eng Prioritéit, och als lëtzebuenger Gesondheetsminister? Wat huet Klimawuessel direkt mat Gesondheet ze dinn?

Mars Di Bartolomeo: Bon, fir d'éischt mol ass et net esou, datt d'Gesondheets Problemer, déi vläit wäit ewech vun eis entstinn, keen Impakt op eis hunn. Dir gesitt dat bei deene groussen Epidemien. Fréier konnt een de Kapp an de Sand stiechen, wann ee vun Honger geschwat huet. Deen ass net exportabel gewiescht. Do konnte mer esou maache wéi wann et eis näischt u géif goen. Bei deene groussen Epidemien, och wa se dausende Kilometer vun hei entstinn, da kënnen se hei landen, doduerch, datt d'Leit vill méi dorëmmer wandere wéi fréier. Beim Klimawuessel ass dat d'selwecht. Wa wäit ewech ufänken d'Mieren ze steigen oder d'Äisbierger ze schmélzen, dann ass net nëmmen den Äisbier - de Polarbier - betraff, mä dann iergend eng Kéier komme mir an d'Spill. An Dir hutt gefrot, ob dat eng Prioritéit fir eis ass. Jo, et ass fir d'lëtzebuenger Regierung definitiv eng Prioritéit. An och wann heiansdo driwwer diskutéiert gëtt, wann d'lëtzebuenger Regierung Moosnamen hält, déi och mol incisiv si fir eis, fir de Klima ze schützen, da gëtt dat net gemaach fir d'Leit ze péngegen, mä da gëtt dat gemaach fir effektiv nach mat Zäit ze reagieren, fir datt mer net herno vun deem Ganzen iwwerrullt ginn. An d'OMS huet ganz recht: wann de Klima sech ännert, dann ass dat net neutral fir eis Gesondheet, da kommen och gesondheetlech Problemer mat deene mir net gerechent hunn.

Frank Kuffer: Dat heescht: kënnt do, mengt Dir, ee generellt Ëmdenken wat

iwwerhaapt Gesondheet a Krankheet ugeet?

Mars Di Bartolomeo: Also fréier ass jo gemengt ginn, datt Gesondheet just Ofwiesenheet vu Krankheet ass. Dat ass awer e bëssche méi komplex. D'OMS definéiert d'Gesondheet net nëmmen als Ofwiesenheet vu Krankheet, mä als Wuelbefannen, dat heescht vill méi komplex. A fréier hu mir Gesondheet oder de Gesondheetsbetrib éischer als Reparaturbetrib ugesinn. Haut gi mir dovun aus, datt wann d'Reparatur usetzt, datt scho viles falsch am Virfeld gelaf ass, an dofir gi mir ëmmer méi zur Gesondheetspromotioun. D'Gesondheet ass dat wichtegst Kapital wat mir hunn, zur Präventioun iwwer. Ouni ze verkennen, datt och ee gudde Gesondheets System, ee solidaresche Gesondheets System, wou jiddwereen d'selwecht behandelt gëtt, deeselwechten Zougang huet, extrem extrem wichtig, mat dat Wichtigst a mat dat Wertvollst wat mer iwwerhaapt hunn. Mir sinn eis deeës net ëmmer bewosst, mä an deene Länner - ee groust Land op der Welt wou 45 Milliounen Leit deen Zougang net zu der Gesondheet hunn - déi wäere frou, wa mer esou ee solidaresche System hunn. Dofir wieren ech mech mat Hänn a mat Féiss géint esou Tendenzen fir den ëffentlechen Gesondheets System zréckzestellen an dat Ganz ze privatiséieren, liichtsënnege vun Eegeverantwortung ze schwätzen an dann dat Ganz ze privatiséieren. Eegeverantwortung kann een iwwerhuelen, dee sech et ka leeschten. Dee Klengen an dee Blutaarmen, dee ka sech dat net erlaben, fir seng eege Gesondheet opzekommen an dofir brauche mer dee solidaresche System net nëmmen hei zu Lëtzebuerg. Mir sollen Hëllef fir esou solidaresch Gesondheets Systemer och op anere Plazen vun der Welt opzebauen. Dofir d'OMS - wann et se net géif ginn, misst een se erfannen - well eben, wéi virdu gesot, déi grouss Krankheete kënnen ganz wäit vun eis entsto an mir Intérêt hunn, do wou se entstinn se an de Grëff ze kréien. Dat gëllt fir de SIDA, dat gëllt fir déi sougenannte Vullegripp, an, an, an.

Frank Kuffer: Mä Klimachangement elo konkret zu Lëtzebuerg. Bon de Moien hu mer elo Schnéi am Abrëll an esou, mä wat kann een da konkret elo och zum Beispill bei eis maachen? Da soen d'Leit, elo ass en do, elo huet en eis schon d'Fëmm verbueden, elo wäerte mer och nach net méi d'äerfe mam Auto fueren, ech menge fir d'CO2 Emissiounen an esou.

Mars Di Bartolomeo: Klimawiessel, Gesondheet ... Ech wëll vläicht just dräi Wieder soen iwwert déi eege Gesondheet. Et ass nun definitiv esou, datt d'Gesondheet vun äusseren Aflëss ganz sérieux ka beaflosst ginn. Déi haapt Doudesursaachen - Häerz- a Kreeslafkrankheeten, Kriibs - kënnen zum Deel duerch schlecht Verhalen oder äusser Aflëss beaflosst ginn. A wann ee géint Tubak virgeet, och géint den Alkoholmëssbrauch virgeet, a wann een de Leit seet Beweegelech an erniert lech besser, dann handelt een op Problemer déi zum gréissten Deel déi schlëmm Krankheete kënnen beaflossen. A wann ee Gesondheitsminister net géint den Tubak géif virgoen, da géif e seng Aarbecht net maachen. Bon, wat de Klimawiessel ugeet, do sinn - d'Rezepter déi leien do, mir halen eis net ëmmer drun, mä dat geet mat klenger Schrëtt. Den Auto méi oft doheem loossen, méi zu Fouss goen, méi mam Velo, méi ëffentlechen Transport. Déi eenheemsch Liewensmëttele begënschtegen, amplaz, datt een am Wanter Erdbier an Hambier a Papayaen, an ech weess net wat iesse geet. Et kann een och de classesche Wanterapel huelen. Ech mengen wat wichteg ass dat ass, datt de Klimawiessel eppes extrem Komplexes ass, mä wa vill vill kleng Gestë sech uneneereien, da kann een dat nach an de Grëff kréien. Déi, déi haut behaupten de Klimawiessel dat wär ee Witz, déi hunn definitiv näischt verstanen. Ech mengen et ass ee Rieseproblem a wa mir en haut net upaken, da bezuele mer et mar, net nëmme mat Geld, mä och mat Wuelbefannen. Ee gesond Klima, eng gesond Ëmwelt gehéiert definitiv wéi aner Saachen zum Wuelbefannen an zur Gesondheet.

Frank Kuffer: Här Di Bartolomeo villmools Merci fir de Besuch am Studio an eng gutt Gesondheet dann.

Mars Di Bartolomeo: Ma villmools Merci.

Source : http://www.gouvernement.lu/salle_presse/interviews/index.html